

Ni Pangulong Henry B. Eyring

Unang Manuglaygay sa Unang Panguluhan



Ang Mangin Matuod-tuod nga mga Disipulo

Sa tagsa ka pangsakramento nga miting, may pribelihiyo kita nga magpangako sa Amay nga Langitnon nga aton pirme panumdumon ang Manluluwas kag tumanon ang Iya mga kasuguan agud mangin kaupod naton ang Iya Espiritu (tan-awa sa Moroni 4:3; 5:2; D&C 20:77, 79). Ang pagdumdom sa Iya natural nga magaabot sa aton sa aton pagdala sang Iya ngalan sa aton kaugalingon. Ginahimo naton ini sa madamo nga mga paagi ilabi na gid kon mag-alagad kita sa iban sa Iya ngalan, magbasa sang Iya balaan nga mga pulong, kag magpangamuyo agud mahibal-an kon ano ang Iya buot ipahimo sa aton.

Natabo ini para sa akon sang naghikot ako sang bunyag sang isa ka pamatan-on nga lalaki. Nahibal-an ko nga gintawag ako sang gin-ordinan nga mga alagad sang Manluluwas bilang isa ka misyonero agud magtudlo sang Iya ebanghelyo kag magsaksi sa Iya kag sang Iya matuod nga Simbahan. Kami sang akon kaupod nga misyonero nagpangako sa pamatan-on nga sia pagatinluan paagi sa gahum sang Pagbayad-sala ni Jesucristo kon sia maghinulsol nga may pagtuo sa Manluluwas kag mabunyagan sang isa sa Iya awtorisado nga mga alagad.

Sang ginpabutwa ko ang pamatan-on halin sa tubig sang baptismal font, naghutik sia sa akon, "Matinlo na ako, matinlo na ako." Sa sina nga tion, nadumduman ko ang pagbunyag sa Manluluwas ni Juan Bautista sa Suba sang Jordan. Labi pa gid, nadumduman ko nga ginahimo ko ang buluhaton sang pagpangsalbar sang isa ka nabanhaw kag buhi nga Manluluwas—nga ginaupdan sang Balaan nga Espiritu, kasubong sa kay Juan.

Para sa akon kag sa tagsa sa aton, ang pagdumdom sa Manluluwas mahimo nga mas sobra sangsa pagsalig sa aton matandaan sang aton ihibalo kag mga inagihan upod sa Iya. Nagahimo kita sang mga pagpili tagsa ka adlaw nga nagapalapit pa gid sa aton sa Iya sa karon nga panahon.

Ang pinakasimple nga pagpili mahimo nga ang pagbasa sang balaan nga mga kasulatan. Sa paghimo sini, sarang kita makaangkon sang pamatyagan nga malapit kita sa Iya. Para sa akon, ang kalapit masami nagaabot kon magbasa ako sang Libro ni Mormon. Sa una nga mga minuto nga ginabasa ko ang mga kapitulo sa 2 Nefi, mabatian ko sa akon hunahuna ang mga tingug nanday Nefi kag Lehi nga ginalaragway ang Manluluwas nga dawsa kilala nila Sia sing personal. Nagaabot ang pamatyagan sang kalapit.

Sa inyo, ang iban nga bahin sang balaan nga kasulatan mahimo nga nagapalapit sa inyo sa Iya. Pero kon sa diin man kag kon san-o man nga basahon ninyo ang pulong sang Dios, nga may mapainubuson kag matuod-tuod nga katuyuan nga panumdumon ang Manluluwas, magatubo sa inyo ang inyo handum nga dalhon ang Iya ngalan sa inyo adlaw-adlaw nga pagpangabuhi.

Ang ina nga handum magabag-o sang pamaagi nga nagaalagad kamo sa Simbahan sang Ginuo. Magapangamuyo kamo para sa bulig sang Amay nga Langitnon agud himuong sing maayo bisan inang sa pamatyag ninyo isa ka gamay nga buluhaton. Ang bulig nga inyo pangayon amo ang ikasarang sa pagkalipat sang inyo kaugalingon kag pagtutok pa gid sa kon ano ang luyag sang Manluluwas para sadtong imo dapat alagaran.

Nabatyagan ko ang Iya kamot kag ang Iya kalapit sa akon pag-alagad upod ang amon kabataan sang nagpangamuyo ako agud mahibal-an kon paano ko sila buligan nga makita ang kalinong nga ang ebanghelyo lamang ang nagadala. Sa amo sini nga tinion, wala ko ginapanumdom ang kabigon nga isa ka madinalag-on nga ginikanan, kundi ginaulikdan ko gid sing dako ang kadalag-an kag ikaayo sang akon kabataan.

Ang handum nga ihatag sa aton mga ginaalagaran ang kon ano ang igahatag sang Manluluwas sa ila nagatuga sang mga pangamuyo nga *nagapakitluoy* sa Amay nga Langitnon, sa ngalan gid ni Jesucristo. Kon nagapangamuyo kita sa amo sina nga paagi—sa ngalan sang Manluluwas, nga may pagtuo sa Iya—ang Amay nagasabat. Ginapadala Niya ang Balaan nga Espiritu sa paggiya, pagpasulhay, kag pagpaisog sa aton. Bangod kay ang Espiritu pirme nagasaksi sa Manluluwas (tan-awa sa 3 Nefi 11:32, 36; 28:11; Eter 12:41), ang aton ikasarang sa pagpalangga sa Ginuo sa bug-os naton nga tagipusuon, hunahuna, kag ikasarang nagatubo (tan-awa sa Marcos 12:30; Lucas 10:27; D&C 59:5).

Ang mga bugay sang pagdumdom sa karon kag sa adlaw-adlaw magaabot sing amat-amat kag tayuyon sam-tang nagaalagad kita sa Iya, nagapaayaw sa Iya pulong, kag nagapangamuyo nga may pagtuo sa Iya ngalan. Kag ang ining pagdumdom magamolde sa aton agud mangin matuod-tuod nga mga disipulo sang Ginuong Jesucristo sa Iya ginharian sa sini nga kalibutan—kag sa ulihi upod sa Iya Amay sa mahimayaon nga kalibutan nga magaabot.

PAGTUDLO GIKAN SA SINING MENSAHE

Si Pangulong Eyring nagalaygay sa aton nga panum-dumon pirme ang Manluluwas paagi sa paghimo sang adlaw-adlaw nga mga pagpili agud mangin mas malapit sa Iya. Upod sa inyo mga ginatudloan, mahimo ninyo basahon ang pang-sakramento nga mga pangamuyo, nga nagaplastar sang pangako nga panumdu-mon Sia pirme (tan-awa sa Moroni 4:3; 5:2; D&C 20:77, 79). Pamensara ang pag-agda sang inyo ginatudloan nga maglista sang mga butang nga sarang nila himuon tagsa ka adlaw agud panumdu-mon ang Manluluwas. Mahimo man ninyo pamensaron nga agdahon sila sa pagpangamuyo sa Amay nga Langitnon para sa kadalag-an kag kaayuhan sang kada isa. Pamensara ang magpangamuyo para sa ila sa amo man nga paagi.

LAMHARON

Ang Pagdumdum sa Ginuo Adlaw-adlaw

Mga abyan, mga buluhaton sa balay, buluhaton sa eskwelahan, TV—kadamo kaayo sang mga butang nga nagapangayo sang aton atensyon. Pero tagsa ka semana, nagapangako kita sa Amay nga Langitnon “nga [aton] pirme ginadumdom [ang Iya Anak, nga si Jesucristo]” (D&C 20:79).

Si Pangulong Eyring nagasiling nga mahimo kita “maghimo sang mga pagpili adlaw-adlaw” nga nagabu-ilig sa aton nga madumduman ang Maluluwas. Pamensara ang paghimo sang lalab-uton sa sini nga bulan sa pagdumdum pa gid sa Manluluwas tagsa ka adlaw. Mahimo kamo maghimo sang kalendaryo kag magpa-ngako sa paghimo sang isa ka butang tagsa ka adlaw agud pabakuron ang inyo relasyon sa Iya. Si Pangulong Eyring nagalista sang mga butang pareho sang pagbasa sang balaan nga mga kasulatan, pagpangamuyo nga may pagtuo, kag pag-alagad sa Manluluwas kag sa iban. May ara man sang pagsulat sa journal, pagtambong sa mga miting sa Simbahan, pagpamati sa pangkabilu-gan nga komperensya, pagtambong sa templo, pag-kanta sang mga himno—nagalaba pa gid ang listahan! Samtang ginapanumdom naton ang Manluluwas kada adlaw, si Pangulong Eyring nagapangako nga “ang mga bugay . . . magaabot sing amat-amat kag tayuyon . . . [kag] magamolde sa aton agud mangin matuod-tuod nga mga disipulo sang Ginuong Jesucristo.”

MGA KABATAAN

Dako Kaayo nga Pagpalangga

Kon kita nagabasa sang balaan nga mga kasulatan Kukon nagapangamuyo, sarang naton mabatyagan kon daw ano kita kapalangga sang Amay nga Langitnon kag ni Jesus. Magdrowing sang pila ka magagmay nga mga korte tagipusuon sa sulod sang mas dako nga korte tagipusuon. Kolori ang isa ka tagipusuon tagsa ka tion nga magpangamuyo kamo ukon magbasa sang inyo balaan nga kasulatan. Ano pa ang sarang ninyo himuon agud makabatyag nga malapit sa Amay nga Langitnon kag kay Jesucristo?



Pag-inakop nga may Pagpalangga Sadtong mga Nagtalang

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano bala ang paghangop sang katuyuan sang Relief Society nagahanda sa mga anak nga babayi sang Dios para sa mga bugay sang kabuhi nga wala'y katapusan?

"**A**ng kamatuoran amo nga wala sang perpekto nga mga pamilya . . .," siling ni Pangulong Dieter F. Uchtdorf, Ika-duhang Manuglaygay sa Unang Panguluhan. "Kon ano man ang problema nga ginaatubang sang inyo pamilya, kon ano man ang dapat ninyo himuong para masolbar ini, ang umpisa kag ang katapusan sang solusyon amo ang pagpalangga sa isigkatawo, ang puraw nga pagpalangga ni Cristo."¹

Sa ila nga wala nagpasakop sing lubos sa ebanghelyo, si Linda K. Burton, anay Pangkabilugan nga Pangulo sang Relief Society, nagsiling: "Palangga sang Amay nga Langitnon ang tanan Niya nga kabataan. . . . Bisan diin pa sila—yara man ukon wala sa banas—luyag Niya nga makabalik sila pauli."²

"Bisan daw ano ka salawayon [sang inyo kabataan], . . . kon mag-sugilanon ukon maghambal kamo sa ila, himoa ini indi sa kaakig, himoa ini indi sa kasingki, sa isa ka nagapang-husga nga espiritu," tudlo ni Pangulong Joseph F. Smith (1838–1918). "Hambala sila sing may kalulo."³

Si Elder Brent H. Nielson sang Seventy nagsulit sang panulin sang Manluluwas sa sadtong mga may 10 kabilog nga pilak kag nadulaan sing isa: "Pangitaa tubtob makita ninyo ini. Kon ang nagtalang amo ang inyo anak nga lalaki ukon babayi, inyo utod nga lalaki ukon babayi, . . . pagkataspos sang tanan naton nga mahimo, palanggaon naton ang ina nga tawo sa aton bug-os nga tagipusuon. . . .

"Kabay nga ikaw kag ako maka-baton sang diosnon nga giya agud mahibal-an ang pinakamaayo nga buhaton agud lab-uton sila nga nadula sa aton kabuhi, kag kon kinahanglan, agud makaangkon sang pasensya kag pagpalangga sang aton Amay sa Langit kag sang Iya Anak, nga si Jesucristo, samtang kita nagpalangga, nagabantay, kag nagahulat sang nagtalang."⁴

Si Pangulong Henry B. Eyring, Unang Manuglaygay sa Unang Panguluhan, nagsiling: "Nagpangamuyo ako sing may pagtuo nga ang tawo nga ginpalangga ko magapanigita kag makabatyag sang gahum sang Pagbayad-sala. Nagpangamuyo ako sing may pagtuo nga may

tawhanon nga mga anghel nga magapalapit sa pagbulig sa ila, kag nag-abot sila.

"Ang Dios nagtigana sang paagi agud maluwas ang tagsa Niya ka kabataan."⁵

Dugang nga Balaan nga mga Kasulatan kag Impormasyon

Mateo 18:12; Alma 31:35;

3 Nefi 13:32; D&C 121:41–42

reliefsociety.lds.org

MGA TANDA

1. Dieter F. Uchtdorf, "In Praise of Those Who Save," *Liahona*, Mayo 2016, 79, 80.
2. Linda K. Burton, sa Sarah Jane Weaver, "Sister Burton, Sister Wixom Visit Church's Pacific Area," *Church News*, Abr. 2, 2013, lds.org/church/news.
3. *Teachings of Presidents of the Church: Joseph F. Smith* (1998), 254.
4. Brent H. Nielson, "Waiting for the Prodigal," *Liahona*, Mayo 2015, 103.
5. Henry B. Eyring, "To My Grandchildren," *Liahona*, Nob. 2013, 71.

Binagbinaga Ini

Paano bala kita makapadayon sa pagpakita sang pagpalangga sa isigkatawo sa ila nga indi gusto magpangabuhi sang mga prinsipyo sang ebanghelyo?